


羊城古鈔

四

ル 5  
1519  
4



1519  
1519 4

辛城古鈔卷五

順德仇池石秦山氏輯

名宦

周召虎康公奭之後宣王六年虎帥師平淮南疆  
理至於南海王錫以圭瓚巨鬯山川土田虎  
拜稽首對揚王休誦天子萬壽大雅美之卒  
諡穆公

秦史祿監郡者也始皇使尉屠睢伐百粵遣祿轉  
餉鑿渠通饌道於湯海山下粵既平立南海  
郡命祿爲監所鑿渠遂爲通道又利灌田時

三才圖會 卷五  
謂之靈渠祿有德於民其後有史定仕南粵  
爲揭陽令元鼎六年漢兵下番禺定決計屬  
漢武帝嘉之封安道侯邑六百戶世襲子孫  
遂家于揭

任囂始皇將也初楚成王頹受天子命鎮粵亂  
及莊王時臣服于楚番禺之都有楚庭焉始  
皇初遣王翦平百粵用屠睢爲尉統五軍討  
不服粵人遯入叢薄而陰置雄傑將攻屠睢  
殺之始皇怒發兵拜囂南海尉往定揚粵囂  
乃入番禺居焉尋以謫徙人五十萬戍五嶺

能和輯粵衆遂定粵亂後諸侯起兵獨南海  
晏然囂之力也今隴口有任將軍廟云

南越趙佗

詳事記

漢陸賈楚人有口辨從高帝定天下居左右常使  
諸侯時中國初定尉佗自王於南越高帝憐  
百姓新勞苦故且休兵使賈賜佗印爲南粵  
王賈至佗魑結箕踞見之賈因以義說佗佗  
乃蹶然起謝曰居蠻中久殊失禮義留陸生  
與飲數月曰越中無足與語至生來令我日  
聞所不聞遂拜佗爲南粵王稱臣奉漢約歸

報高帝大悅拜賈爲大中大夫文帝卽位賈復使粵令佗去黃屋稱制令比諸侯皆如意旨賈之力也世傳賈兩奉使所著有南粵行記紀其遊覽所及中有羅浮山巔有湖環以嘉植南粵花有芳香者移自外國不隨水土而變賈嘗與佗汎端溪讌於錦石山今山下有陸大夫祠粵人歲時祀之

終軍字子雲濟南人年十八選博士弟子詣府受遺太守聞其有奇才召見甚奇之軍步入關關吏與繻爲傅軍棄繻而去至長安上書

言事武帝異其文拜軍謁者給事中從上幸雍祠五時獲白麟一角五蹄又得奇木其枝旁出輒復上合帝異之博詢羣臣軍上對曰臣聞詩頌君德樂舞后功異經而同指明盛之所隆也夫明德之徵上亂飛鳥下動淵魚各以類推合野獸弁角明同本也衆枝內附示無外也若此之應殆將有遠方蒙化者焉對奏稱旨由是改元爲元狩後數月軍言果奇中擢諫議大夫元鼎四年軍自請願受長纓羈南粵王致之闕下乃遣軍使南粵粵王

聽許請舉國內屬未幾相呂嘉舉兵反軍不屈而死史紀殺漢使終軍予其節也

路博德平州人初爲右北平太守元狩四年從驃騎將軍以功封邳離侯後遷衛尉元鼎五年秋南粵叛以博德爲伏波將軍同楊僕往討之師出咸陽分五路博德次於桂陽下湟水與僕會番禺時博德所將兵道遠後期乃有千餘人進居西北建德與嘉皆城守而僕自擇便處居東南攻敗粵人縱火燒城粵素聞伏波名皆降於博德嘉與建德夜亡入海

博德遣人追捕其校司馬蘇宏生獲建德粵郎都稽追及嘉斬其首以獻六年三月論功博德仍舊侯益封六百戶後以子犯罪免上念其功以爲彊弩都尉屯居延卒今連州湟水上有伏波將軍廟以祀博德益報功也

馬援字文淵茂陵人慷慨有武畧輔光武中興爲虎賁中郎將建武十七年交阯女子徵側與女弟徵貳反攻沒其郡九真日南合浦蠻皆應之寇畧領外六十餘城於是璽書拜援伏波將軍督樓船兵沿海而進山刊道千餘

里十八年春軍至浪泊上與賊戰大破之明年正月斬徵側徵貳傳首洛陽封援爲新息侯嶺嶠悉平立銅柱於漢之極界自南海撫定珠厓調立城郭置井邑立珠厓縣二十年秋振旅還京師援好騎善別名馬得駱越銅鼓乃鑄爲馬式上之二十四年擊武陵五溪蠻至壺頭病卒初援在交阯常餌薏苡實用能輕身以勝瘴氣援欲以爲種載一車還人以爲南土珍怪權貴皆望之援時有寵故莫以聞及卒後有上書譖援者謂所載還皆明

珠文犀梁松以宿憾復謗之帝益怒援妻孥惶懼不敢以喪還舊塋槨葬城西肅宗建初三年追諡曰忠

羅宏長沙人征和中爲交阯部刺史前任者以海隅荒遠行部罕徧宏旣至發蒼梧春征冬息咨詢民間疾苦爲之劑調稽察吏治太守墨酷者多解印綬肉袒請罪所至繕緝城社經畫山川番禺舊有尉佗南武城其北有粵王山山路石磴相連便於登覽相傳爲宏所闢

羊坡古鏡 卷五 五  
三國吳步騭字子山淮陰人性寬宏得衆世亂避  
難江東以種瓜自給晝勤四體夜誦經傳建  
安中孫權爲討虜將軍召騭掌書記除海鹽  
長歷交州刺史吳中舊遊聞之曰步子山有  
此功業日闕矣明年拜使持節征南中郎將  
劉表所置蒼梧太守吳巨陰懷異心外附內  
違騭計斬之威聲大震交阯太守士燮兄弟  
相率供命南土之賓自此始初州治在番禺  
故城西接牂牁沮洳難居騭治尉佗故都築  
立城郭民用綏集拜平戎將軍封廣信侯

虞翻字仲翔餘姚人少好學有奇氣年十二客  
有侯其兄者不過翻翻追與書曰僕聞琥珀  
不取腐芥磁石不受曲鍼過而不存不亦宜  
乎客得書奇之由是見稱爲孫策功曹待以  
交友之禮嘗以所著易注示孔融答書曰聞  
延陵之理樂觀吾子之治易乃知東南之美  
者不獨會稽之竹箭也孫權時爲騎都尉翻  
屢犯顏諫爭權不悅翻性疎直數有酒失權  
積怒遂徙翻南海雖處罪放而講學不倦門  
徒嘗數百人又爲老子論語國語訓註皆傳

於世翻既放棄嘗曰自恨疎節骨體不媚犯  
上獲罪當長沒海隅生無可與語死以青蠅  
爲弔客使天下一人知己者足以不恨初山  
陰丁覽太末徐陵或在縣吏之中或衆所未  
識翻一見之便與交善終成顯名在南十餘  
年年七十卒歸葬舊墓妻子得還翻子十一  
人汜最知名嘗爲監軍使以討扶巖功拜交  
州刺史封餘姚侯謫宦

陸邱字敬宗吳人凱弟也赤烏十一年九真蠻  
賊攻沒城邑揚粵騷動有趙姬者年長不嫁

八山聚羣盜自爲首領攻劫郡邑勇敢善戰  
嘗著金錫跣戰退輒張帷幕少勇數十侍側  
無能制之者乃以邱爲交州刺史安南校尉  
邱八南界集交廣兵喻以恩信務招納高涼  
渠黨皆降趙姬亦平交域清泰加安南將軍  
永安元年徵爲西陵督封都亭侯今城北有  
甘溪邱所浚也所撰有廣州先賢傳行於世  
晉羅友襄陽人刺廣州在藩政舉大綱不存小察  
吏民安之有天韻好遊觀嘗疊石以玩簾泉  
七月中旬倡爲遨頭與民同樂後改益州卒



陶侃字士行鄱陽人以荊州刺史討平杜弢王  
敦忌其功左遷廣州刺史平越中郎將時王  
機據廣州侃至遣兵斬機一方賴之以功封  
柴桑侯侃在州悉取賓佐酒器蒲博之具投  
之江語人曰大禹聖人乃惜寸陰至於衆人  
當惜分陰豈可逸遊荒醉生無益於時死無  
聞於後是自棄也侃居常朝運百甓於齋外  
暮運於齋內人問其故答曰吾方致力中原  
豈可過自優逸其勤勵類如此交州刺史王  
諒爲賊梁碩所陷侃遣將高寶進擊平之晉

號征南大將軍開府儀同三司王敦反侃復  
遣將高寶致討及敦平遷都督荆雍等八州  
諸軍事荊州刺史交廣併領焉楚郢士女莫  
不相慶後都督荊州敗石勒將平襄陽拜大  
將軍大尉封長沙郡公卒年七十六諡曰桓  
吳隱之字處默濮陽人元興元年爲龍襄將軍  
廣州刺史都督交廣二州軍事行次貪泉酌  
而飲之賦詩曰古人云此水一勺懷千金試  
使夷齊飲終當不易心及蒞州清操踰常食  
惟菹菜乾魚而已帷帳器服皆附外庫時人

羊城一錄 卷五  
頗謂其矯然始終不易元興中下詔褒賞及  
盧循陷南海長子曠之戰沒隱之爲循所得  
囚之表請加戮詔不許劉裕與循書令遣隱  
之還久方得返歸舟之日裝無餘貲其妻劉  
氏齋沉香一觔隱之索而投諸湖亭之水今  
有沉香浦居宅籬垣仄陋內外茅屋六間僅  
容妻子尋拜度支尙書後遷中嶺軍每月初  
得祿裁留身糧其餘悉分給親族義熙八年  
知劉裕有異志隱之遂請老詔許之九年卒  
子延之復勵清操爲鄱陽太守

唐杜審言字必簡襄陽人擢進士爲隰城尉恃才  
高以傲世見疾遷洛陽丞貶吉州司戶坐事  
免官還東都則天召爲著作郎神龍初流峯  
州嘗遇南海遊白雲至亂石山賦詩往來交  
廣久之入爲修文館學士卒贈著作郎審言  
生子閑閑生甫檢校工部員外郎與李白齊  
名時號李杜 謫宦

宋璟南和人舉進士耿介有大節好學工文辭  
開元初爲御史大夫力辯魏元忠之誣會有  
飛書告張昌宗者請窮究太后欲原之令詣

三城百錄 卷五  
璟謝璟不見曰公事公言之若私事法無私也後坐小累徙廣州都督廣人以竹茅茨屋多火璟教之陶瓦築堵自是鮮火患恩州苗帥作亂遣五府總管臨之以甲卒開諭以恩信革心降服種落大寧召拜刑部尙書尋遷吏部兼侍中封廣平郡公廣人爲璟立遺愛頌璟上言頌所以傳德載功也臣治績不足紀廣人以臣當國故爲溢辭徒成詔諛宜釐正之請自臣始有詔許停止樹張說所著碑終尙書右丞相致仕璟風度凝遠人莫測其

量始自廣州入朝帝遣內侍楊思勗驛逐竟不交一言思勗自以將軍貴幸訴之帝益嗟重唐稱賢相莫有過者開元末年卒贈太尉諡文正

許渾字用晦睦州人以詩名大中三年任監察

御史常祇命南海在廣州多所題詠

流寓

李羣玉字文山澧州人好學善書工於詩律裴休觀察湖南厚延致之大中間詣闕上表語頗訐直宰相崔鉉進其詩三百篇聲譽大著會休入相首薦之云羣玉放懷幽壑吟詠性

情比妍詞於麗則動清律於風騷冥鴻不歸  
羽翰自逸霧豹遠跡文采愈奇詔以處士授  
弘文館校書郎羣玉東歸遂遊嶺外入廣州  
訪五仙遺跡往遊蒲澗復登羅浮皆有題詠

流寓

曹松字夢徵舒州人奉賈島爲師累試不偶南  
遊廣州山水勝處必流連累日嘗至西樵棲  
遲以之教其民焙茶復至盧垓石咨問處士  
陳陶舊跡人因改石爲南箕臺云松後北還  
舉進士年七十餘

流寓

馮立馮翊人有武毅畧涉書記正觀中爲千牛  
衛將軍拜廣州都督前後作牧者多贖貨爲  
蠻獠患由是數怨叛立不營求衣食取給而  
已常至貧泉嘆曰此吳隱之所酌也一杯何  
足道哉吾日汲而飲能易吾性乎遂飲去在  
事數年甚有惠政卒於官

張祐字承吉清河人工詞賦與遊多賢俊或薦  
於朝書奏不下受辟諸侯府狷介鮮容輒自  
劾去後爲南海令廉潔自持一介不取期月  
解職惟載羅浮石筍還生平不治產子孫幾

不能給温庭筠經其故居作詩悼之有丹陽  
集行於世

盧奐滑州人宰相懷慎之子少爲郎吏以清白  
聞歷御史中丞出爲南海太守兼五府經畧  
節度使南海利兼水陸珍寶山積前守劉巨  
鱗彭杲皆坐贓鉅萬特授奐代之遐方之地  
貪吏歛跡中使市泊亦不敢干法邊俗咸安  
時謂自開元來廣州節度清白宋璟李朝隱  
及奐三人而已詔加銀青光祿大夫三年入  
爲尙書右丞

李勉字元卿長安人少喜學內沉雅外清整肅  
宗卽位靈武擢監察御史糾劾武臣背闕喧  
嘩者帝嘆曰吾有勉朝廷始尊入爲京兆兼  
御史大夫尋爲嶺南節度使番禺賊馮崇道  
梁崇牽等負險爲亂殘十餘州勉遣將李觀  
率容州刺史王翊討斬之五嶺遂平西南番  
舶向歲至者纔四五譏視苛密故也勉旣廉  
潔又不暴征明年至者四百餘柁居官久未  
嘗收飭器用車服後召歸至石門盡搜家人  
所蓄犀珍投江中其介如此部民叩闕請立

碑頌德代宗許之進工部尚書封汧國公德  
宗立加同平章事帝問曰衆言盧杞爲奸邪  
朕殊不覺其然勉對曰天下皆知而陛下獨  
不知此所以爲奸邪也卒年七十二贈太傅  
諡曰正簡

孔戣字君嚴魯國人 至聖三十八世孫擢進  
士歷官左丞忤中官出爲華州刺史明州歲  
貢淡菜蚶蛤之屬戣以爲自海抵京師道路  
凡役四十三萬人奏罷之歷大理卿國子祭  
酒會嶺南節度使缺帝謂裴度曰嘗論罷蚶

菜者誰歟今安在是可往爲朕求之度以戣  
對卽拜嶺南節度使旣至免屬州逋負十八  
萬緡米八百斛黃金稅歲八百兩南方鬻口  
爲貨掠人爲奴婢戣峻爲之禁由是閭里相  
約不敢犯士之斥南不能北歸與有罪之後  
百餘族才可用用之黃洞諸蠻叛久不平容  
桂二管利擄掠幸有功乃請合兵討之戣固  
言不可帝不聽後果無功安南乘之殺都護  
李象古而桂管裴行立容管陽旻皆以憂死  
獨戣不邀一旦功交廣晏然大治以禮部尙

書致仕卒年七十三贈兵部尚書諡曰正  
章正貫字公理萬年人舉賢良方正異等除太  
子校書累擢嶺南節度使南海舶賈始至大  
帥必取象犀明珠上珍而售以下直正貫既  
至無所取吏咨其清南方風俗右鬼正貫毀  
淫祠教民無妄祈會海水溢人爭咎之貫登  
城沃酒以誓曰不當神意長人任其咎無逮  
下民俄而水去民乃信之居鎮三歲卒贈工  
部尚書

宋呂居簡河南人宰相蒙正之子初爲殿中丞慶

歷中提點京東刑獄夏竦有憾於石介介死  
竦言於帝曰介不死北走遼爾乃遣中使發  
棺驗之居簡力言不可乃止進龍圖閣直學  
士知廣州陶甕城人以其便以兵部侍郎判  
西京御史臺卒

程師孟字公闢吳縣進士歷知縣所至有聲知  
福州治行尤著移知廣州大修學校日引諸  
生講解負笈而來者甚衆諸番子弟皆願入  
學以右諫議大夫再任在廣威愛並行初州  
城爲儂寇所毀師孟築復廣十二里帝遣中

使撫問召判三班院念前功以爲給事中集  
賢修撰洪福廣越四州皆爲立生祠

蔣之奇字穎叔宜興人以伯父廕授官尋擢進  
士歷集賢殿修撰知廣州妖人岑深善幻聚  
黨二千人謀取新興畧番禺之奇遣鈴轄楊  
從先致討生擒之南海饒寶貨爲吏者多貪  
聲之奇繪吳隱之宋璟盧奐李勉等十人像  
建十賢堂祀之冀變其習凡所經遊多所題  
詠

陳峴字山甫平陽人少篤學工文辭淳熙進士  
歷官有政聲嘉定元年知廣州事兼勸農使  
充廣南東路經畧安撫使馬步軍都總管先  
是邑民苦預借峴至蠲諸邑宿逋四萬六千  
緡免大禮歲助賞錢一萬四千緡罷諸場稅  
額最爲民害者二千五百緡幕僚以舊額請  
峴以州賦代輸且奏於朝無得預借民獲甦  
息廣學宮治城濠設閘門瀦水以備非常閱  
歲百役並興勞費不憚時獠寇犯界謀窺州  
城峴募勇敢軍日加訓練益爲備城以南戶  
口繁夥舊無捍蔽乃築東西鴈翅城以翼之



三城石鏡 卷五  
郡多士貢額纔十三峴爲請於朝嘉定三年  
贈額爲二十五帥廣三年改務寬簡民甚德  
之嘗以政暇委州文學齊琥鹽官李端仁編  
南海志凡都會名蹟堙遏弗彰者皆補書之  
遂成一方信史

李綸字世美泉州人以蔭歷仕有清操淳熙初  
提舉廣東常平日適伯兄維守恩平酌別江  
濱兄弟相勵以清白綸慷慨臨江籲天曰倘  
負軍民有如此水遂投杯於江杯停不沒者  
久之觀者驚嘆綸與兄維卒以廉稱云民爲

歌曰石門之水清且清晉吏一歌千古榮爭  
如李公投杯盟江流洶洶杯停停

周惇頤字茂叔號濂溪道州人熙寧元年爲廣  
東轉運判官提點刑獄洗冤澤物不憚勞苦  
雖瘴鄉險遠亦按部及之自韶至惠登羅浮  
賦詩後知南康軍家廬山年五十七而卒所  
著太極圖及通書發明奧義接孔孟之薪傳  
黃庭堅稱其胸次灑落如光風霽月程珦使  
二子頤顥往受業焉嘉定十三年賜諡曰元  
淳祐元年封汝南伯從祀文廟

方大琮字德潤莆田人淳祐二年帥廣凡六年以儒飭吏以政齊俗鄉飲酒禮久廢命賓佐與髦士討論之禮樂器服悉還古制歲一行之拜七十有奇膝席以宴漏過三十刻時齒已邁而終禮無倦色丁祭儀文未稱自冕服弁以至簠簋籩豆鐘磬琴瑟祝歆之屬悉考古訂禮改作又建書室之飛閣翼以四齋儆清海軍門以雄藩府規模十倍於昔

王罕字師言華陽人爲廣東轉運使行部至惠聞儂智高圍廣州乃召惠之耆長令發壯丁又召尉徵取弓手耆長所發久不至適有婦人訴僕夫奪其釵珥者罕令斬僕夫首置道傍告民曰壯丁不行故誅之民聚觀有懼色於是耆長得壯丁六百尉得弓手二千罕又選銳士三千以百四十艘建旗作樂順流趨廣州旣至斬木枝爲鹿角數千令徒卒先登士以鹿角從之布岍上屬於南門徐自勒兵作樂啟門而入智高擁衆觀之不敢犯遂引兵去人皆多其智勇云

潘美字仲詢大名人少儻素以功名自負開

羊城古錄 卷五  
寶三年征嶺南以美爲行營都部署尹崇珂副之師平賀州下昭桂連三州至韶州攻拔之斬獲數萬張窮蹙遣其左僕射蕭灌中書舍人卓惟休奉表乞降美因諭以赦意令殿直冉彥袞卽送灌等赴闕張復遣其弟保興率衆五十萬拒戰美率勵士卒兼程趨柵頭遣丁夫數千人持二炬間道抵柵及夜萬炬俱發會天大風火勢益熾張衆驚擾美麾兵急擊之張衆大敗斬首數萬長驅至廣州遂擒張露布以聞卽日命美知廣州兼市舶使

五年兼嶺南道轉運使土豪周思瓊作亂討平之嶺表遂安初南中身丁錢甚重雖婦女不免乃奏罷之終檢校太師同平章事卒贈中書令諡武惠子惟熙以父功授官

余靖字安道曲江人皇祐四年儂智高圍廣州朝廷起靖知桂廣經制廣東西賊乃趨廣州靖先移檄交阯及諸峒使捍禦會狄青兵至大戰於崑崙關智高敗走靖選敢死士入特磨道生擒智高母與弟送闕下戮之後知廣州先是番舶裝發皆征稅靖奏罷之及歸不

三城古鏡 卷五  
持南海一物廣俗輕揚教之禮法簡而不苛  
百姓懷之

蘇軾字子瞻眉州人紹聖中爲章惇所排以兵  
部尙書謫惠州經南海山川名勝多所題詠  
如元妙觀則有衆妙堂記千佛塔寺則有手  
書六榕扁額遊蒲澗海珠靈洲妙高臺俱有  
詩刻碣今祀於靈洲妙高臺軾先居惠四年  
移瓊州廉州召還卒諡文忠 謫宦

文天祥字宋瑞又字履善廬陵人美皙如玉年  
弱冠理宗親拔進士第一考官王應麟奏曰

是忠肝鐵石也臣敢賀得人元兵侵宋宦官  
董宋臣說上遷都人莫敢議其非天祥爲南  
海軍節度判官上書乞斬宋臣以一人心不  
報累除軍器監兼權直學士院以忤賈似道  
罷德祐初詔天下勤王天祥捧詔涕泣遂起  
兵諸豪傑皆應有衆萬人事聞以江西提刑  
安撫使召入衛會宋降元除右丞相兼樞密  
使使元軍請和與元丞相伯顏抗論臯亭山  
伯顏怒拘之天祥與其客杜潁十二人夜亡  
乃東入海至温州端宗立以觀文殿學士侍

三城古金 卷五  
讀召至福州拜右丞相引兵出江西元將李  
恒兵猝至襲興國天祥戰不利引兵走追至  
空坑軍士皆潰天祥妻妾子女皆見執時賞  
坐肩輿後兵問爲誰時賞曰我姓文衆以爲  
天祥擒之天祥因此得逸去端宗崩衛王繼  
立天祥上表自劾乞入朝不許八月加少保  
信國公軍中疫且起兵士死者數百人天祥  
惟一子與母皆死進屯潮陽元將張宏範以  
海舟濟潮陽天祥方飯五坡嶺宏範兵突至  
遂被執天祥見宏範不拜宏範以客禮見之

與俱入厓山使爲書招張世傑不可索之固  
乃書零丁洋詩與之宏範笑而置之遣使護  
送至燕天祥不食八日不死留燕三年坐卧  
一小樓足不履地元主知不可屈議釋之有  
以天祥起兵江西事爲言者元主召入諭之  
曰汝何願對曰天祥受宋恩爲宰相安事二  
姓願一死足矣然尤不忍遽麾之退言者力  
贊從其請乃卽刑天祥從容謂吏卒曰吾事  
畢矣南鄉拜而死俄有詔止之無及矣數日  
妻歐陽氏收其屍面如生年四十七衣帶中

羊坊古鏡 卷五 三  
有贊曰孔曰成仁孟曰取義惟其義盡所以  
仁至讀聖賢書所學何事而今而後庶幾無  
媿今城南大忠祠祀之

陸秀夫字君實鹽城人其父徙家鎮江景定登  
進士李庭芝鎮淮南辟至幕下三遷至主管  
機宜文字咸淳十年庭芝制置淮東擢叅議  
官德祐元年邊事急諸僚屬多亡者惟秀夫  
數人不去累擢宗正少卿兼權起居舍人二  
年正月以禮部侍郎使軍前請和不就而返  
與蘇劉義追從二王於温州召陳宜中張世

傑等皆至遂相與立端宗於福州秀夫進端  
明殿學士簽書樞密院事與宜中議不合宜  
中使言者劾罷之世傑讓宜中曰此何時動  
以臺諫論人耶宜中惶恐亟召還時君臣播  
越海濱每朝會秀夫儼然正笏立如治朝或  
時在行中淒然泣下以朝衣拭淚衣盡浥屬  
井澳颶風端宗以驚疾崩羣臣皆欲散去秀  
夫曰古人尙以一旅一成中興今度宗皇帝  
一子尙在百官有司皆具士卒數萬天若未  
欲絕宋此豈不可爲國耶又相與立弟昺嗣

羊坊古鏡 卷五 三  
帝位年八歲矣時宜中往占城屢召不至乃以秀夫爲左丞相與世傑共秉政世傑駐兵厓山秀夫外籌軍旅內調工役凡有述作盡出其手雖匆遽流離中猶日書大學章句以勸講祥興二年二月厓山兵敗秀夫走御舟先杖劍驅妻子入海卽負帝赴海死年四十四祀城南大忠祠同時死難諸大臣高桂徐宗仁趙樵茅湘馬南寶劉鼎孫乾隆二十三年增祀于祠之東室

張世傑范陽人自金來歸爲呂文德小校累遷

郡統制度宗末呂文煥以襄陽降元世傑將五千人守郢元遣人招之不聽德祐元年徵諸將勤王多不至獨世傑提所部兵入衛上下歎異自和州防禦使不數月累加至保康軍承宣使總都督府兵遣將四出取諸郡兵勢頗振七月與劉師勇諸將出師焦山操戰艦名黃鵠白鷁者萬餘每十艘一鯨沉鐵碇於江示以必死元將阿朮以火矢分兩翼夾攻之張宏範董文炳以銳兵橫擊之自寅至遂蓬檣灼盡士卒投江死者數萬人無一降

者世傑奔圖山上疏請濟師不報數月爲沿江午討使兼知江陰軍元兵至獨松關加保康軍節度使知平江尋召入衛加檢校少保明年正月元軍迫臨安世傑請移三宮入海願與天祥合兵背城一戰丞相陳宜中方遣人請和難之和亦尋沮元兵駐臯山世傑趨定海石國英遣都統卞彪來椎牛享之酒半彪從容說降世傑大怒斷其舌磔之巾子山招從二王入福州與衆共立端宗拜簽書樞密院事元將阿剌罕來攻世傑奉端宗航海

由泉州入廣復潮州明年唆都遣人招端宗又遣孫安甫說世傑拘之不遣劉深急攻淺灣世傑兵敗移端宗入井澳深復來攻世傑戰却之因徙碭洲端宗崩奉弟昺嗣位拜少傅樞密副使以碭洲不可居再徙厓山封越國公祥興二年正月張宏範等兵至厓山衆謂北兵若塞海口將困我不能進退盍先據之卽不利猶可西走世傑慮久在海上衆或生心動則必散乃曰頻年航海何時已乎今須與決勝負悉焚行朝草芾結大舶千餘作



水砦爲死守計已而宏範果據海口樵汲道絕兵茹糗飲鹹輒嘔泄大困世傑率蘇劉義方興日大戰宏範父柔以降元累封蔡國公宏範念世傑故父部曲嘗至港外呼與道舊世傑不往甥韓在軍中使三至招之世傑曰降吾知必生且富貴直當爲主死耳因歷數古忠臣以答二月癸未宏範等攻厓山世傑敗走御舟元兵薄中軍世傑斷維以十餘艦奮港出還收兵厓山旣覆復欲奉楊太后求趙氏後立之太后亦赴海死世傑收葬之海

濱五月四日舟抵平章港颶風作世傑辦香祝天曰天乎不欲吾復存趙氏乎大風覆吾舟舟遂覆死焉與天祥秀夫三人俱祀城南祠曰大忠

曾逢龍寧都人登慶元進士咸淳末爲新會令政務化民有古循良風每以節槩自許景炎元年六月元將呂師夔遣其將黃世雄攻廣州經畧使徐直諒遣李性道拒之性道降秋九月連韶諸郡俱降制置使趙潛乃舉逢龍判韶州將兵禦之時東莞民熊飛復廣州世

三才圖會 卷五  
雄遁去曾逢龍引兵至性道迎謁因執斬之  
端宗在閩下詔褒其功師夔復統大軍至逢  
龍拒守南雄力戰師潰乃正衣冠自縊而死  
詔贈龍圖閣學士

明廖永忠巢縣人元末兵起率戰艦千餘艘屯巢  
湖爲水寨乙未五月聞明洪武起淮甸與兄  
永安仗策從之命永安爲水將副以永忠後  
永安陷於張士誠俾永忠總其兵累功至平  
章洪武元年平閩二月拜征南將軍叅政朱  
亮祖副之率舟師取廣東勅永忠等以除暴

解懸大慰民望廣東要地惟在廣州廣州旣  
下餘可傳檄而定永忠自福州移書嶺表開  
示禍福左丞何眞卽遣前都督僉事劉克佐  
檢校梁復初以廣惠梅循四州奉表內欵夏  
四月師至眞封府庫籍戶口以待廣州平遂  
分兵剿三山賊邵宗愚殺分省右丞鐵理迷  
失元帥吳都蠻等諸郡縣望風來歸及招諭  
海南無不響應五月送眞歸朝移兵平廣西  
三年八月與朱亮祖凱還十一月論功封德  
慶侯賜鐵券永忠貌不踰人而性識豁達撫

三城百錄 卷五  
綏初附甚得其宜廣人德焉

花茂巢縣人元末率義兵歸附累功授神策衛指揮僉事洪武庚申調廣州左衛剿平陽春清遠英德博羅諸寇壬戌討岐黎捕倭海上丙寅東莞香山龍川翁源民作亂討平之進指揮同知尋平電白賊戊辰破歸善諸賊已已連擢廣東都指揮同知子孫世襲廣州左衛指揮使是年平南海香山等寨辛未捕斬連郴廣右徭賊三萬餘人癸酉討東莞筍岡寇平之甲戌疏請徙東莞香山諸縣逋逃蛋

戶爲兵復奏增廣海碣石等二十四衛所議於山海要害立營置戍詔從之乙亥討平黎寇明年入覲帝慰獎之召用其次子英會英討番禺山寇有功遂進茂都指揮使授英都指揮僉事踰年茂卒賜葬牛首山廣人於粵秀山祀之英武毅有父風亦歷都指揮使今粵秀山上觀音閣茂所建也

解縉字大紳吉水人洪武戊辰進士選庶吉士改御史時進直言無所顧忌高皇帝令歸讀書十年復來尋命縉修正元史踵成宋書刪

定禮經凡例皆留中永樂初詔備顧問累遷侍講學士與楊榮輩並直文淵閣上嘗密詢儲嗣縉稱太子仁孝太孫英特漢王高煦聞之大恨亡何諫征交趾出爲廣西叅議道經廣東遍遊名勝嘗至南海西樵山題廖謹讀書處李至剛劾其怨望改交趾八年奏事南都值車駕北征高煦譖之逮詔獄卒洪熙初官其子正期中書舍人

楊信民越之新昌人永樂庚午貢士擢刑科給事中正統十一年擢廣東叅議旬宣所至愛恤窮困如保赤子正統己巳以劾貪被逮廣人詣闕留之復職敕守白羊關廣人復奏賊黃蕭養作亂願得信民還廣則寇賊可弭帝可其奏進右僉都御史巡撫廣東至廣時賊衆數萬有民走愬者官司疑其爲賊間繫之獄信民命出之卽予押印公據數萬散布四方約曰縱爲盜有此據者悉免罪願入城者聽令旣下爭趨城至輒泣下信民發粟賑之時持議者曰縱盜入城患生不測咎將誰歸信民曰吾獨當之越月餘賊衆纔數百人耳

三城古金 卷五  
一日蕭養率衆求見於城濠之南信民單車  
出止水次賊曰豈真吾楊父母耶信民下車  
揮左右岸烏紗示之賊衆羅拜信民諭以朝  
廷恩威賊衆欣諾遂令一人饋生鯉一信民  
受而剖之分送諸司賊聞而驚曰此吾誅戮  
兆也時閉城久疫死者衆信民命瘞諸城北  
郊爲文哭祭之民無不感泣者俄而信民以  
病卒城中哭聲聞數日民請建祠祀之始啓  
土時獲孤忠大節楷書石刻於地中人以爲  
異諡曰恭惠

王守仁字伯安餘姚人父華成化辛丑進士第  
一守仁生有異徵己未成進士會星變陳言  
邊務八事多剴切授刑部主事歷南贛都御  
史定宸濠之亂封新建伯中蜚語罷嘉靖六  
年起爲都御史總督兩廣軍務時田州土目  
盧蘇王受構亂陷思明思恩守仁壹意招徠  
受等遂降諸兵皆撤一方晏然是年復討平  
八寨斷藤峽等蠻乃駐鎮廣州講明聖學與  
增城湛若水往還議論守仁稱爲聖人之徒  
方獻夫何鰲諸人皆師事之八年卒於南安

贈侯爵諡文成萬歷初從祀文廟元孫業浩  
天啓五年復任兩廣總督平銅鼓九運諸山  
賊粵人德之

黃諫字廷臣蘭州人博學多藝工隸篆行草八  
分書正統壬戌進士授編修天順中出使安  
南交人稱其風節好品泉論郊畿以玉泉爲  
第一論京城以文華殿東大庖厨井爲第一  
作水記後謫廣州通判每遨遊白雲蒲澗間  
評廣州泉水以鷄爬井爲第一更名學士泉  
鐫題名勝作八分書廣人多從之遊後召還

宦謫

毛伯溫字汝厲吉水人正德戊辰進士歷官大  
子少保兵部尙書兼右都御史安南黎嗣被  
殺莫登庸據其地國大亂久缺朝貢嘉靖十  
八年帝決意討之命伯溫統兵南征許以便  
宜至廣發諸省土漢狼達兵二十餘萬從廣  
滇分三道進伯溫知叅政翁萬達材畧過人  
遂以事屬之萬達首誅廣右土帥及劇盜通  
安南者復出重賞懸購登庸師次南寧安南  
大震登庸請罪且言黎氏死無後願歸欽州

三城古錄 卷五  
四崗故地世奉朝貢伯溫受降於鎮南關登  
庸率屬繫頸徒跣蒲伏納降復遣姪莫文明  
代詣闕下伯溫具疏請從之以登庸爲安南  
都統使進伯溫太子太保班師以時弊當釐  
革者八事疏聞尋入掌兵部事未幾卒贈少  
保

陶魯字伯強鬱林人以父成浙江按察司僉事  
死節蔭景泰五年爲新會丞值令缺視篆精  
敏祛宿弊正詭籍猾胥不敢舞文吏民至庭  
一見輒能識其姓名威信大著秩滿值西路  
諸徭寇境百姓詣當道乞留許之魯設守練  
兵衆皆樂爲死守尋擢新會令累進兵備僉  
事按察使時高雷廉肇流賊攻掠無完聚魯  
設方畧擒斬劇賊奪回所掠修築城堡招募  
義勇諸賊悉平乃奏立新寧從化龍門縣治  
又討後山瀧水及潯梧荔浦府江田州諸盜  
悉殲之下詔褒勵累官湖廣布政使仍兼廣  
東兵備副使轄治廣西故蠻寇呼爲陶三廣  
習俗至今稱之嘉靖中命守臣建祠廣州祀  
其父子孫遂家焉

吳桂芳字子寔新建人嘉靖甲辰進士歷官叅政分守嶺西以作養人才爲已任後以兵部侍郎提督兩廣時興寧賊葉丹樓花腰蜂等勾引倭賊焚掠爲害桂芳討之俘斬二千四百有奇未幾柘林海兵稱亂揚帆直抵城下桂芳陽令招之隨調東莞南頭兵自外洋入總兵等自惠陽趨東洲南出合擊大敗之又以粵城西南商民輳集近海無障蔽議築外城自東徂西防禦嚴密海賊曾一本入犯民恃無恐粵人思保障功立祠祀之祠在城南

潘季馴歸安人進士嘉靖戊午以御史按廣東風裁大著懲貪吏除積惡解煩役定均平百姓懷其惠比代去遮道留之祀於郡學西偏韓雍字永熙長洲人正統壬戌進士授監察御史年甫二十左都御史王驥獨器重之有重務或巡大藩輒奏委之所至伸冤抑鋤強梗黜貪殘治聲大振遷廣東副使少保陳循疏雍才擢僉都御史巡撫江西調大同宣府尋召爲兵部侍郎成化初以呈誤出爲浙江叅政會兩廣寇弗靖將出師議總督兵部尙書



王竝及廷臣交薦遂拜僉都御史總督兩廣軍威大振擣其巢穴賊震駭俘斬不可勝計餘黨皆降以其地改爲上隆州更名武靖司以土官置藤縣千戶所鎮之刻石紀功而還擢左副都御史旋以父喪歸再起爲右都御史鎮兩廣蠻人懾服以父呼之後與中貴人黃沁有郗被誣乃謝病歸卒諡襄毅雍身長俊偉落落有大節具文武才天下仰之粵人祀于西樵山雲路村

林挺玉字粹夫侯官人以進士歷廣東提學副使挺玉剛果敏達雅以文章自許廣士人宗之其在諫垣上保治八箴請誅太監梁芳妖僧繼曉風節卓然

高瑤閩縣人知番禺爲政先風化後簿書廉正有威人自不犯布政使陳選每嘆以爲古之循吏市舶太監章眷家人不法選籍其貲諸司無敢收者瑤請以身當之未幾眷誣奏選被逮瑤亦落職東書數篋飄然而去士民泣送者幾千人

毛吉字宗吉餘姚人景泰甲戌進士天順五年

三城古錄 卷五  
拜廣東僉事時城以西流賊殺掠居民殆盡  
其東幸無事而豪宗大戶武斷吞併吉分巡  
惠潮悉痛懲之豪右斂跡適程鄉賊餘黨作  
亂吉督戰擒之又討平雷廉高三郡積寇以  
平賊功陞本司副使下詔褒之委以邊務時  
新會告急吉率都指揮孫壁等官軍三十人  
又得民兵將萬人行至火磴與賊遇戰破之  
斬首二十餘級乘勝追至雲岫山去賊營十  
餘里時二鼓乃號召諸將曰賊營後山箐而  
前畝田左右皆山隴若敗必遜入後山爾等

明日兩哨進據後山我以精銳衝其中合擊  
之賊可盡擒也約黎明進兵是夜昏黑遂至  
後期不得已三哨齊進賊果敗走後山吉命  
潘百戶率精銳千人據賊營賊多遺財物卒  
競取之賊遽擁衆馳下刺殺潘卒皆自營門  
湧出賊從後追之遂奔潰吉勒馬揮刃大呼  
曰力戰無殞衆潰不可禁從吏廖振等勸吉  
始避之吉曰吾誓不與此賊俱生言未已賊  
衆持鎗趨吉吉且罵且戰猶手斬一賊斷其  
臂力不能支遂被害是日雷雨大作山谷皆

三城古金 卷五  
震連日陰晦又八日始得吉屍面貌如生昇  
歸官吏士民哭者相屬事聞贈吉通議大夫  
廣東按察使諡忠襄錄其子科爲國子生科  
後亦舉進士官至按察司副使粵人祀吉于  
忠賢街祠曰忠襄

蔣榮字晚先常熟人進士知南海立催輸法勒  
爲九規民不擾而賦益辦聽訟明而不苛盜  
所誣指悉至不問官未三月平反冤獄二十  
餘人又設中西下西二哨以嚴海防清東山  
寺田歸之學宮月三課士倡明古學居任二

載丁內難去伊子另有傳

張國維字玉笥東陽人天啟二年進士知番禺  
縣政尙廉平興學校課農桑以德化民聽訟  
從容不盡繩之以法有兄弟爭產庭詰之歛  
歔嘆息民遂悔悟甲子歲饑閩船羣至販糴  
米價日湧巡按陳保泰閩人故曲庇不禁郡  
民數萬往愬保泰復行遏糴衆大譁自辰至  
午不散國維馳至以利害喻之衆始散去非  
國維幾至激變秩滿擢給諫去累官兵部侍  
郎巡撫應天後以閣部督師死金華

羊城古鈔卷六

順德仇池石秦山氏輯

人物

周高固南海人顯王時以才能歸楚為威王相時  
 有鐸椒者以王不能盡觀左氏春秋采取成  
 敗卒四十章為鐸氏微繇固進之以故文教  
 日興先是南海有勇獲者仕吳王夫差為將  
 黃池之會夫差命王孫雄先與獲帥徒師以  
 為過賓于宋以焚其北郛焉而過之南海介  
 荆揚裔土周初始通中國王會以翟貢稱蠻

羊坡古鏡 卷九  
揚焉尚力而已迄附於楚乃顯庸有文事則  
固之爲功云黃佐云自會稽以南踰嶺皆粵  
地也秦漢之先蓋已有聞人者鄒陽曰齊用  
粵人子臧而彊威宣裴淵曰南海高固爲楚  
威王相時有五羊啣穀之祥歐大任曰固越  
人也世在越稱齊高僂之族

公師隅粵人也越王無疆爲楚所敗其子孫遜  
處江南海上爭爲王周赧王時有自立爲王  
者隅以無疆時避楚居會稽東武山歸而相  
度南海將築南武城以居越王而越王不果

遷時越王與魏通好使隅復往南海求犀角  
象齒以獻之久在嶠外乃得諸琛併吳江樓  
船會稽竹箭獻之魏魏王乃起師送越王往  
荆栖之沅湘於是南武疆土遂爲越貢奉邑  
稱雄於交趾云 通志

漢梅銷其先越勾踐子孫避楚走丹陽更姓梅周  
末散居沅湘秦併六國越復稱王遂踰零陵  
往南海銷從之至臺嶺家焉越人以文事知  
名者自高固始以武事知名自梅銷始當越  
人之復畔也以銷爲將銷下令戶出壯士一

羊坊古鏡 卷九  
人領以戶將使合傳胡害將之戰則編爲什  
伍領以隊將使搖母餘將之將士受命乃率  
之歸番君吳芮銷勸芮西從沛公伐秦芮然  
之使銷先往當是時郡縣苦秦法多殺長吏  
以應陳勝等項梁殺會稽守田儉殺狄令劉  
季以書殺沛令東陽殺其令以推陳嬰使芮  
不聽銷言終爲秦守其不同於會稽狄沛東  
陽者無幾矣銷旣行遇沛公於南陽與言相  
合遂從攻柘酈降之又從攻武關破之秦滅  
項羽封銷爲臺侯食臺以南諸邑其後沛公

以銷能成番君功名復封銷廣德十萬戶廣  
德卽今祁門縣也夫以銷之才爲百粵人所  
歸設當大楚方張之時使庾勝兄弟絕關自  
守其智勇豈遂出囂佗之下耶是時銷之王  
在滇水上固勾踐之本支也銷卽奉其王以  
繼禹少康宗祀亦孝子慈孫之所有事焉者  
而銷以爲秦者周之寇讐非僅越人與六國  
人之寇讐也越人首畔秦吾當帥之以爲周  
先王報怨且先君勾踐能滅吳尊周室其遺  
風餘烈子姓當繼紹而起毋以竊據一方爲

羊坡古鏡 卷九  
天下所指名爲也嗟夫自唐虞夏而後得天  
下之正者莫如漢明而越人率爲功首能以  
大義鼓倡諸侯銷與何真是也銷可以爲趙  
佗真可以爲劉巖而皆不爲與馮盎者亟以  
十二州縣歸唐皆可謂能知天命者也臺嶺  
故銷湯沐地今無銷祠吾嘗歎爲曠典夫任  
器且祀於瀧口佗亦祀於玉山况銷之賢者  
乎祁門地接鄱陽有銷祠與鄱陽番君祠相  
望今臺嶺亦卽建之以爲銷主祠可也 通志  
楊孚字孝元建中初舉賢良對策上第拜議郎

和帝卽位欲伐北夷孚奏言創造用武守業  
尙文故周勝殷則有載戢干戈之頌太宗嘗  
言自勝衣冠念不及兵先帝繼述敵來則應  
未嘗先伐故孝章之謚追配孝文願陛下繩  
美祖宗毋輕用武永元十二年荒旱令在廷  
臣議政令得失孚曰漢制郡國之士誦肄孝  
經察其志行選舉孝廉故帝謚必稱孝者躬  
行化率也王莽不服母喪天下誅之今時公  
卿大夫懼父母憂不得去位而黎氓孝悌力  
田反得爵級非所以爲民表儀也宜詔中外

臣民均行三年通喪吏治必務廉平以勸選舉之士帝從其議時南海屬交趾部刺史夏則巡行諸郡冬則還大府表奏舉刺其後競事珍獻孚乃著南裔異物志枚舉物性靈悟指爲異品或爲韻語使士民識之後爲臨海太守復著臨海水土記亦以正獻貢也孚家在珠江南嘗移洛陽松栢種植宅前隆冬蜚雪盈樹或問其故孚曰偶然耳草木豈能動天哉人因曰其所居地曰河南

南海縣志

漢羅威字德仁性惇愨幼知禮讓八歲喪父哀毀

如成人事母至孝勤苦奉養奇珍必力致寒夜身先温席母乃寢制行高雅口無俚言足不履權門待妻孥如賓客耕遺田以自給非其力不食鄰家牛數犯其稼威屢刈芻潛納其門牛主驚怪久之知爲威感其長者自是檢束不忍犯途遇老穉負戴輒代其任邑人化之令異其行辟署門下吏威辭不就偕母遁於增城母喪哀毀蔬食三年卽葬廬墓朝夕哀泣白鹿止其旁馴擾如家畜世以爲孝感所致



羊坡古鏡 卷之六 五  
唐頌字德雅以孝聞遭親喪毀幾滅性逮葬躬負土爲墳旁結茅廬寢處其中扶服哭踊朝夕捧盥進膳事之如生者六年有甘露降於樹稱爲唐孝子親歿後終身衣不純采非祭不茹酒肉見親遺物或經所遊歷處淚潛潛下不克止其篤行益天性也南齊永明中范雲爲廣州刺史首遣使祭孝子羅威唐頌墓廣人多感頌之賢並尸祝之

董正字伯和少有令姿眈意經術年十五通毛詩三禮春秋遂以學行知公府辟命皆不就  
熹平末每仰觀天象輒掩泣太息賦性高潔貧寒不戚躬耕自贍暇則講詩書陳禮法遠近多從之遊里中或少爲不善者必相戒曰吾伯和得無入於耳否有不平者多詣正求直隱士南陽車遂聞正名千里投正正與同志恩如兄弟居數年遂病正傾家救恤卒爲殯殮躬送喪於南陽而返粵素多奇瑰之貨習尙輕悍未嘗知學感正清白澆俗日更建安中正卒葬番禺之東衆爲刻碑表曰有漢徵士董君之墓過者必式晉隆和中海太

羊坡古鏡 卷六  
守袁宏追思風采錄行以聞詔表閭墓禁樵  
牧

陳臨字子然少時奮志絕俗舉孝廉永建中官  
蒼梧太守推誠而理導人以孝弟有子爲父  
報怨殺人者繫於獄臨知其無嗣令其妻侍  
獄中產一男郡人歌曰蒼梧府君恩廣大能  
令死囚有後代建安中徵爲廷尉卒後蒼梧  
人以五月五日記臨東城門上令小童潔服  
舞之其後子孫蕃盛播於嶺徼祀鄉賢

踈源字元流南海人爲郡戶曹資性廉家貧餉

晏不至同舍郎餉先至呼之共食源輒力辭  
後爲尙書郎習練故事爲九卿所重故人有  
詣源欲通苞苴者源絕不荅臨別便與訣曰  
子以言污我從此與子絕矣居常拱手端坐  
儼直遇隆寒擁敗絮震掉戰慄吏獻裘堅却  
之從司徒上書言事忤權貴廢於家而卒

張買粵人也父戍以越騎將軍與華母害從高  
帝定三秦有功未及封而死買少善射知書  
拜中大夫孝惠帝時侍遊苑池鼓櫂能爲越  
謳時切規諷不自言父戰勲高后稱制丞相

羊城古鏡  
審食其爲言之於是封買爲南宮侯傳其子  
生遂家長安建元初有罪奪爵光和中粵民  
祠買相傳買父子相繼正色立朝故扁其祠  
曰秉政云

晉王範好讀書有鑒識州閭重之吳孫皓時閉門  
不出或問其由對曰見彈繳而弗避非靈禽  
也處亂世而求聞達非知士也人以為名言  
郭馬亂廣州逐刺史徐旗範從旗避難既歸  
以琴書自娛未嘗妄交有司賢其行辟之皆  
辭晉平吳後遵行九品官人之法州置大小

中正刺史熊睦薦州人德充才盛無踰範者  
乃以範爲廣州大中正選人才第高下皆愜  
輿論時秘書丞河內司馬彪號博學嘗著九  
州春秋盛行於時範閱之見其畧於嶺服紀  
錄弗稱乃蒐羅百粵典故爲書名曰交廣春  
秋太康八年表上之訂述該覈自是名動京  
師範爲人卓犖不群篤學至老不廢交廣素  
缺修載自範始爲之文獻賴以存焉南海縣志  
黃恭字義仲自少恬淡履尙清潔刺史鄧岱一  
見器之錄爲記室叅軍草檄聲罪山越讐服

尋轉封山令有治才州察孝廉舉爲著作佐  
郎以父憂去不起教授生徒發明聖經鄉里  
推重徵辟不就乃補廣州大中正於是蒐輯  
王氏交廣春秋補其遺漏以君親倫理爲重  
後復廣爲十三州記族子整爲平越司馬博  
學工文詞有集十卷

洗勁讀書尙節操爲廣州中兵叅軍元興三年  
冬海寇盧循圍廣州勁帥兵五百人出戰城  
陷爲循所執神氣自若循欲釋而用之勁叱  
曰賊奴乃欲凌國士耶遂遇害刺史吳隱之

上其事義熙中追贈始興太守曲江縣侯謚  
忠義 廣州府誌

唐張九齡字子壽宏雅從子別駕君政生剡令子  
胄子胄生索盧丞宏愈嘗僑南海生九齡其  
夕母夢九鶴盤天而下故名幼聰敏七歲知  
屬文居父喪哀毀逾常庭木忽連理人謂孝  
感所致年十三書干廣州刺史王方慶嗟賞  
之曰此致遠器也會張說謫嶺南一見厚遇  
宗景龍元年擢進士第二人授校書郎元宗

在東宮舉文學士以道侔伊呂科策高第遷左拾遺帝卽位久未郊見九齡上言繼統之主首重郊祀報所受也陛下紹休聖緒於今五載未行大報不可以訓帝嘉納之俄遷左補闕開元十年遷司勳員外郎張說爲相尤親重之稱爲後出詞人之冠尋擢中書舍人內供奉封曲江男帝封泰山說多引所親及錄事主書攝官超遷至五品九齡當草詔謂說曰官爵者天下之公器今登封霈澤千載一時而清流不霑殊恩胥吏獨濫章綬恐四

方失望說曰事已決矣已而制出謗興御史中丞宇文融陳營田法說輒違之融積不平九齡爲言說不聽俄而說爲融等所詆幾不免九齡亦改太常少卿出爲冀州刺史以養母求罷改洪州都督徙桂州兼嶺南按察選補使決獄程材無不允當始說知集賢院嘗薦九齡可備顧問說卒帝思其言召爲秘書少監集賢院學士會賜渤海詔當草者不副帝意乃以屬九齡詔成大見褒賞擢工部侍郎知制誥帝嘗謂侍臣曰九齡文章獨步本

三才古金 卷六  
朝朕終身師之不得其一二真文場中之元帥也帝於勤政樓作七寶山座高七尺召諸學士講經義談政務惟九齡議論風生得升此座時論美之屢乞歸養不許移其弟九臯九章官嶺南近地聽給驛省覲尋轉中書侍郎以母喪去哀毀不勝衣有白鳩來巢紫芝產座側二十一年冬奪哀徵拜中書侍郎同平章事固辭帝不懌謂忠孝一理喪已踰年何不奉詔今國家需賢急安得拘常禮乎明年遷中書令封始興伯時天長節百僚上壽

多獻珍異惟九齡進千秋金鑑錄具陳前古廢興之道帝賞異之會范陽節度張守珪以斬可突干功帝欲徵爲侍中九齡曰宰相代天理物惟賢是授安可以賞功帝曰假其名若何對曰名器不假遂止吏部侍郎李林甫佞而狡奏對稱旨帝欲相之九齡曰陛下相林甫恐異日爲社稷憂不聽林甫無學術忌九齡文行見重於帝乃引牛僊客爲尙書預政事九齡持不可亡何欲賜僊客寔封九齡又執奏帝滋不悅翼日林甫進曰僊客宰相

三城古金 卷六  
材也何有於尙書哉帝決意用僊客九齡既  
戾旨慮爲林甫所危因帝賜白羽扇獻賦自  
况雖見優答竟以尙書右丞相罷政事而相  
僊客封隴西郡公自是朝士多恃祿養資矣  
會監察御史周子諒論僊客語援議書帝怒  
杖子諒流瀼州而九齡嘗薦子諒坐貶荊州  
長史開元二十八年春乞歸展墓曲江五月  
遭疾卒年六十有八贈荊州大都督謚文獻  
九齡文章冠一時諤諤有大臣節天下稱曲  
江公而不名初帝愛九齡學行言無不聽待

以殊禮及屢進直言雖陽嘉賞內寔嫌之武  
惠妃謀陷太子瑛九齡力持之安祿山初以  
偏校入奏氣驕九齡已知其爲亂人及討奚  
契丹敗張守珪械赴京師九齡署其狀曰穰  
苴出師首誅莊賈孫武習戰猶戮宮嬪守珪  
執法祿山不宜貸死帝曲宥之九齡曰祿山  
喪師不可不誅且有逆相弗誅必爲後患帝  
曰卿無以王衍識石勒枉害忠良卒不聽帝  
遷蜀思其先見所爲流涕遣使祭之厚恤其  
家建中元年德宗賢其風烈下詔褒美贈司

徒仍遣使致祭所著曲江集傳於世金鑑錄  
失傳子拯最著其後裔散處荆閩至今衣冠  
不絕餘詳名宦傳張九臯弱冠舉孝廉歷官  
五府按察使兄九齡求解相待養不許詔改  
授九臯南康別駕以便養尋罹母憂兄弟皆  
哀毀骨立每行哭則畜犬隨號鄉閭嗟異服  
闋除殿中丞遷尙書職方郎中已而九齡謫  
荊州九臯亦貶外臺歷郡太守山南東道采  
訪處置使嶺南五府經畧節度使封南康郡  
開國公食邑七百戶遷殿中監天寶十四年

卒於西京年六十六贈廣陵大都督府長史  
子十一人捷端州刺史擢金吾叅軍撫韶州  
刺史抗侍御史能直諫捍建陽令抗子仲方  
最知名餘詳名宦傳

趙德海陽人進士沉雅專靜通經能文章其論  
說排異端宗孔氏元和間韓愈刺潮置鄉校  
牒請德攝海陽尉爲衙推官專領學事潮士  
自此興學後愈移袁州邀不往別以詩云婆  
婆海水南簸弄明月珠因出所爲文授德序  
之世號天水先生配祀韓廟



唐鄧文進自南陽涉南海世雄於財至文進折節  
讀書館穀賓客千餘人因選勇畧輦使捍鄉  
井番人悚服役屬唯謹隋改廣州爲番州治  
始興郡大業中文進爲刺史移州治於武水  
西煬帝被弑文進募兵赴難旬月間合數萬  
度庾嶺值僞帥林士宏據處饒阻不克進於  
是退保番韶二州歸者如市豪酋楊世畧據  
循潮馮盎據高羅甯長真據欽廉桂州諸郡  
文進皆通書定盟以生民爲念粵不罹兵者  
文進力也唐高祖武德四年諸帥以次納款

四月文進率所部歸命高祖賞勞之拜鷹揚  
將軍刺史如故累立戰功卒

廣州府誌

韓瑗南海人唐顯慶中爲宰相諫廢王皇后立  
武昭儀高宗大怒褚遂良又諫被貶瑗救之  
許敬宗李義府囚誣瑗不軌貶南海卒廣人  
爲宰相自瑗始其直諫不回蓋古大臣之誼  
張九齡繼之卓識風度遠邁姚宋天下稱曲  
江公而不名而瑗也寔開其先焉

南海女子唐上元初人製輦鑑圖名曰八花轉  
輪鈎枝鑑銘凡一百九十二字廻環讀之四

字成句其構思精巧寓詞箴規似有得乎風  
人之旨可與蘇若蘭璇璣圖范陽楊氏天寶  
迴文詩並傳舊有王勃序云上元二年歲次  
乙亥十有一月庚午朔七日丙子子將之交  
趾旅次南海有好事者以轉輪鈎枝八花鑑  
銘示子云當今之才婦人也觀其藻麗反覆  
文字縈迴句讀曲屈韻調高雅有陳規起諷  
之意可以作鑑前烈輝映將來者也昔孔詩  
十興不遺衛姜江篇擬古無隔班媛蓋以超  
俊穎拔同符君子者矣嗚呼何勒非戒何述


非才風律苟存士女何算耶撫鏡以長想遂  
援筆而作叙太原王勃撰復有令狐楚跋云  
元和十三年二月八日子爲中書入翰林學  
士夜直禁中奏進旨檢事因開前庫東閣於  
架上閱古今撰集凡數百家偶於王勃集中  
卷末獲此鑑圖并序愛玩久之翼日遂自摹  
寫貯於箱篋寶歷二年乃命隨軍潘元敏繪  
於縑素傳諸好事者太原令狐楚記考唐武  
后時有南海七歲女子武后命賦詩送其兄  
卽應聲曰別路雲初起離亭葉正飛所嗟人

異鴈不作一行歸此女子不知姓氏豈即為  
盤鑑圖銘者歟此圖會附子安集以行復為  
令狐文公所賞吁亦異矣哉

讀盤鑑圖說

花上八字枝間八字環旋讀之四字為句  
遞相為韻其盤屈糾結為八枝者左旋讀  
之自篇字起至詞字止當就支韻右旋讀  
之自詞字起至篇字止當就先韻

盤鑑圖



南漢鍾允章博學能文詞南漢劉龔據廣州設科  
取士允章進士及第累遷至中書舍人尤見  
知於晟誥勅碑記多命爲之遊羅浮應制爲  
詩盛見褒賞每稱爲倚馬才拜工部郎中知  
制誥使楚求婚楚不許是時馬希廣新立希  
萼起兵武陵允章還具言楚可攻狀晟遣巨  
象指揮使吳珣帥師伐之克賀桂連宜嚴梧  
蒙七州以允章有議賞賚不可勝紀令傅長  
子張及張嗣位以藩府舊僚敬重之擢尙書  
左丞叅知政事時張淫戲無度委政宦寺女

巫宮婢朋妖亂政允章深嫉抗請誅亂國法  
者張不能從羣小側目被讒族誅國人以允

章忠鯁皆爲之掩涕允章弟有章亦以文學

稱累官翰林學士中書舍人先允章卒

廣東通志

宋李昉字俊明父天棐贈龍圖閣待制母黎氏

夢大星降庭而生昉英少雋穎文思絕人弱

冠以春秋首解崔與之深器重焉寶慶丙戌

進士第三人授汀州推官郡守鷙悍部卒構

亂昉英討平之以母憂去起武學博士未赴

會推鋒卒叛攻廣州闔郡大震與之令昉英

與楊汪中縋城下諭賊退擢大理司直轉太  
學博士賜對劄語多剴切帝賜金旌之以親  
老求外補除直秘閣福建提舉甫下車貪吏  
望風解印去歲大稔相俸賑貸所活萬計與  
之卒請歸持心喪不許尋丁父憂去既葬築  
室墓右與宗族子弟講業其中累召不起淳  
祐初以吏部郎召會丞相杜範侍御劉漢弼  
祭酒徐元杰暴卒人皆疑史嵩之所爲廷臣  
莫敢言昴英獨請正嵩之罪復陳三事曰定  
國本去權奸斥闍寺上嘉其直書名御屏擢

右正言帝謂宰相曰李昴英南人無黨中外  
憚之除兼侍講益感知遇知無不言會嵩之  
服闋謀再起昴英奏其罪浮四凶當竄之荒  
裔疏再三上乃策免嵩之時執政陳韓剛狠  
京尹趙與篸暴斂並奏劾之上卻其疏昴英  
引帝裾跪奏上怒拂衣入留疏御榻再拜而  
退命與外補三學諸生以詩餞諸國門外歸  
之日父老爭持彩幟親迎焉三除外秩皆不  
赴會權鄉師邛迪嘉淫刑以逞昴英繳告赦  
留郡庫乞辯平民之寃全活者數百人竟以

此落閣職以徐清叟薦起直寶謨閣江西提  
刑兼知贛州慨然以洗冤澤物自任糾貪墨  
決冤滯一道蕭然升直寶文閣徵爲大宗正  
卿兼國史編修寔錄院檢討賈似道丁大全  
用事首疏論之有西太一之幸復陳曰邊寇  
方強四郊多壘卧薪嘗胆此其時也湖上遊  
觀路途迢遞圓輦必暮意外可虞上嘉納焉  
擢龍圖閣待制吏部侍郎封番禺開國男時  
內侍董宋臣輩竊弄威福御史洪天錫疏攻  
之俄解言職昴英乞與俱貶留疏拜辭歸隱

文溪之上久之召爲端明殿大學士僉樞密  
院事不赴丁巳秋忽一夕大星殞舍東闔城  
駭觀次日昴英卒諡忠簡昴英天性勁直議  
論高邁其文簡而婉同館如江萬里文天祥  
皆推服之平居接物盎然寬和至於臨大節  
處大難毅不可奪著有文溪集州南江中有  
海珠石昴英讀書其上後人因祀焉有司復  
祠於城北

番禺縣志

崔與之字正子增城人紹熙四年登進士授潯  
州司法叅軍調淮西檢法通判邕州邕守苛

羊城百錄 卷六  
刻諸卒衣饜不時給卒變漕司檄與之攝守  
諸卒帖然密訪首事者誅之擢發遣賓州事  
轉廣西提刑所至停車裁決獎廉劾貪風采  
凜然浮海巡朱厓吏請決諸神與之曰海外  
諸州官吏夙恣不法將民害是除寧問神耶  
朱厓產苦蒼民以代茗歲賦五百緡瓊織錦  
爲衣所役皆婦人棄稚遺老有踰年者民病  
之與之並榜免其他利害多所罷行士林彙  
其事爲海上澄清錄嶺海去天萬里貪吏多  
虐民乃疏陳十事高惟肖鐫之名嶺海便民

榜召爲金部員外郎安撫淮東歷帥淮蜀謝  
病歸理宗卽位召爲吏部尙書三辭不就亡  
何起廣東經畧安撫使兼知廣州會廣州權  
鋒軍倡亂焚惠州博羅令鄭勳死之長驅至  
廣州聲言欲得連帥及幕屬甘心焉與之家  
居肩輿登城叛兵望而羅拜曉以逆順皆釋  
甲聽命首謀者懼獨受禍遂率衆奔肇慶自  
固與之亟受新命卽家治事密遣提刑彭鉉  
捕之俄而諸軍畢集賊力屈請降遂誅其桀  
黠者餘分隸諸州帝注想彌切徵爲叅知政

事踰年拜右丞相致仕卒諡清獻別詳人物傳

余靖字安道曲江人皇祐四年儂智高圍廣州朝議起靖知桂廣經制廣東西賊乃趨廣州靖先移檄交阯及諸崗使捍禦會朝廷命宣徽使狄青將兵至大戰於崑崙關智高敗走靖選敢死士八特磨道生擒智高母與弟送闕下戮之後知廣州先是番舶裝發皆征稅靖奏罷之以來遠商又戒官吏不得市南藥及歸不持南海一物廣俗輕揚教之禮法簡而不苛百姓懷之終工部尙書諡曰襄餘詳人物傳

梁百揆字宗盛番禺人登嘉泰甲子省元嘉定丁丑進士歷官奉議大夫廉明仁恕雖職非言路而屢疏國政以直諫有聲退隱禺山闢異端彰聖學有功名教卒葬葛麻山學者稱爲端懿先生

溫若春少力學能文事二親以孝嘉定中廷對第一官校書郎崔與之素重其學行紹定三年上詢與之南中人才對曰吳純臣有監司



之才温若春宜清要之任遂除秘書郎博洽  
古今同列推服與之帥維揚握手道生平曰  
人之功名晚節爲難若春唯唯遂力請挂冠  
以朝奉郎致仕家居節儉年八十餘卒淳祐  
中廣帥方大琮立四先生祠祀古成之李昴  
英郭閫暨若春云裔孫舊聞嘉端中爲學正  
以志節稱

黃俊沉重有謀宋末爲摧鋒將軍德祐二年元  
阿里海牙呂師夔襲廣州經畧使徐直諒遣  
提刑李性道同俊拒之至石門遙望元兵甚

盛性道大恐俊曰吾觀彼衆部伍未整分兵  
爲兩翼遶其後擊之可得也性道不從旣而  
元兵結陣而前後迎敵力戰性道不爲之援  
敗績奔還廣州陷授性道官俊不屈死之省志  
郭閫字開先登淳祐甲辰進士授真陽尉調鬱  
林學官擢知高要縣有政聲秩滿授梅州僉  
判改宰平江擢監察御史知無不言不避權  
要所彈擊公論莫不稱焉初廣州置買銀場  
本與商舟爲市後從而征之歲久弊滋吏緣  
爲奸民不勝苦又提舉鹽司以鹽科配民戶

深山窮谷重罹其害聞以狀聞報罷之百姓大悅初汀贛壯丁往來潮惠循梅境以販鬻爲事紹定間緣征權激變詔免權四州鹽至是復權之兵民相率爲盜奏罷之且請選廉恕以宣德意斥貪繆以蘇瘡痍遷右正言首陳納諫之道以廣上心因言士大夫奔競成習營求薦引無所不至至於寬縱盜賊殘害良善者比比皆然復言今天下之患莫甚於上下不相接選帥闔拔偏裨旌死節誠方今急務乞選朝臣出使審核虛寔庶幾募兵督

餉不敢爲欺時禁廷臣預兵事聞乃言臣當言路天下事皆當預聞况邊務猶最大者於是兵糧額數皆關白諫院聞自官臺諫後悉心憂國形神日瘁循至病革所言皆軍國大事不少及私卒年六十六聞素清潔家無餘財屬纊之日幾無以斂上爲嗟悼贈恤特厚廣人以閭配享崔清獻祠

張鎮孫字鼎卿咸淳辛未進士廷試爲天下第一其所對制策有曰帝王之治天下自積一念之仁始帝王之仁天下自積一念之敬始

又曰臣竊觀聖心或者未能積其敬也夫主  
一之謂敬無適之謂一今也恐懼於旱潦之  
警固知敬矣悅懌於瑞芝之觀何所積之未  
純耶齋莊於圭璧薦享之時固知敬矣轉移  
於霞光迎導之際何所積之有間耶時度宗  
好機祥故其言如此授秘書監正字遷校書  
郎尋通判婺州德祐元年元兵至鎮孫奉二  
親歸廣臺章劾之詔罷鎮孫職端宗航海幸  
閩廣間廣州海上三軍奉鎮孫爲帥與都統  
凌震誓圖恢復景炎元年十二月帝舟次惠

州之甲子門詔以鎮孫龍圖閣待制廣東制  
置使兼經畧安撫使委以軍事元酋帥呂師  
夔張榮寔已入廣州聞鎮孫至退走命其將  
梁雄飛守之二年四月帝舟次於廣之官富  
塲鎮孫守禦而力不支城陷明年二月師夔  
還師執鎮孫北歸死於大庾文天祥作詩悼  
之時陳仲微紀海上事書鎮孫死節董師謙  
亦云鎮孫死難惜無有暴白之者

廣東通志

王道夫少從陳大震遊苦志力學陳文龍榜進  
士咸淳中仕連山尉有保民戢寇功以才畧

三城石錄 卷六  
知名張鎮孫敗後凌震得脫收拾散亡數千  
倚文天祥諸軍爲聲援時道夫家居端宗召  
爲權兵部侍郎兼轉運判官與凌震各將兵  
相爲犄角景炎二年天祥復惠州震與道夫  
復廣州詔褒諭之以震爲廣東制置使道夫  
拜兵部侍郎廣東轉運使祥興改元加道夫  
學士兼兵部尙書十月元將李恒襲破廣州  
力戰不利凌震遂降道夫因憤恚而卒廣東通志  
古成之字亞奭先惠州河源人五季末來籍增  
城性簡靜好學嘗結廬羅浮博覽羣籍文譽

殷殷動四方宋初嶺嶠文風未振每取士各  
路止一人衆推成之雍熙改元充秋賦督府  
爲之勸駕明年上春官擬奏籍第二臚唱而  
暗乃同籍陰害之事覺將寘之罪反爲申救  
人服其量端拱初再舉登第初調元氏尉改  
知益都俱以惠愛著咸平三年除校書郎特  
爲張詠所器及李順亂蜀辟成之知綿之魏  
城自內豎王繼恩討賊居民避兵者多溺死  
積醜如壘子遺者皆瘡痍流徙成之勞來煦  
育之米饑者藥病者所活數千人又立學校

課農桑俗爲一改五年蜀又有警復以詠知益州再辟成之知縣竹一以理魏者理之縣竹大治卒于官成之以文章爲南徼首倡尤工於詩雅意林壑嘗爲麟洲鸞谷之遊或傳爲遇異人仙去立祠祀之四世孫革徙居梅州另有傳

熊飛有武畧善騎射李用堦也當宋末以布衣奮起勤王聞丞相文天祥師次江西將往隸焉遇元將黃世雄梁雄飛畧地入東莞遣其裨將姚文虎招降飛勒兵斬之盡殲其軍世

雄等走新會莞令曾逢龍因率兵與飛趨廣執降元通判李性道數其罪而誅之進復韶廣二州時宋制置使趙潛至以元將呂師夔張榮貴入梅嶺遣飛與逢龍禦之逢龍戰死南雄飛退保韶州師夔等攻圍急飛晝夜督兵登陣且守且戰爲叛人劉自立賣降城遂陷飛巷戰死所居桐嶺去荒城十里有塔植其傍因名曰榴花塔飛與元兵大戰處每陰雨聞金鼓聲塔下左爲花溪右爲銀塘有巨石飛自刻花溪銀塘四大字亂之復整人以

主城古金 卷六  
爲神同時許之鑑者集兵赴義後飛死之鑑  
走從文天祥於汀洲力戰五坡嶺被執不屈  
死又保昌邱必明咸淳中進士德祐丙子從  
飛軍拒元師於梅關致命之日白血飛流無  
涓滴紅者與文丞相遇害頸中湧白膏數尺  
事絕相類 廣東通志

明孫蕡字仲衍順德人元季避亂何真保有南海  
蕡往從之洪武改元征南將軍廖永忠至蕡  
爲真作書請歸附曲盡誠款永忠不戮一人  
而南海帖然者蕡之力也永忠尋徵蕡典郡

教三年庚戌詔天下設科取士蕡舉於鄉授  
工部織染局使尋出主虹縣簿時經兵燹十  
室九空蕡加意勞來民還其業甫一載入爲  
翰林典籍學士宋濂樂韶鳳承旨詹同甚重  
之日侍帝奏對敏便容觀飄逸濂輩自以爲  
莫及也八年同修洪武正韻九年以奉常之  
節監祀西川居翰林三載力求補外爲平原  
簿無何逮繫輸左較築蕭垣望都門謳吟爲  
粵聲督者以聞召至陳詩皆忠愛語特命釋  
之十一年罷歸遨遊雲林中益肆力於問學

嘗和陶潛歸去來辭以寫其情十五年召拜  
蘇州府經歷蘇爲劇郡難治黃區畫有方政  
用大和二十二年謫戍遼東時都帥梅思祖  
節鎮三韓素聞黃名迎置家塾尋坐藍黨見  
逮或勸以疏自明不荅長歌就刑有黃泉無  
客店今夜宿誰家之句天下寃之年五十有  
六門人黎貞時亦在戍收葬於安山之陽黃  
平生譔述甚富旣沒零落弗傳番禺趙絢稱  
其寃極天人性命之理爲嶺表儒宗云所著  
有西菴集傳於世

南海縣誌

李德字仲修博極羣書邃於經學洪武庚戌以  
明尙書薦於京師上親策問授洛陽典史遷  
濟南西安二府經歷久之以老願就教職改  
漢陽教諭時兵革初靜翼舍翳蓬藿中生徒  
僅十輩皆獷野寡文德盡心訓迪人知向學  
改義寧教諭俗尤荒陋德孜孜勸諭文教日  
敷科貢漸盛當道交薦之然德已告歸卒於  
家德爲詩初効太白長吉後乃力追古作者  
有易菴集晚更潛心伊洛之學謂誠意爲聖  
哲心要世稱理學者必推仲修子孚亦能詩

趙介字伯貞父璟元臨江路治中介博通六籍  
星官禪史悉究其奧閉戶讀書無仕進意時  
有李韉者南海文士也以薦起介力止之不  
可臨別泣謂曰堯天雖長劉日寔短子獨不  
爲高堂念乎韉竟去後倅南康坐累乃歎曰  
趙伯貞真高士也洪武己巳以累逮赴京道  
南昌卒於舟中介顏如渥丹丰度類神仙中  
人四子潔絢繹純皆善詩文工篆隸時稱四  
懷絢亦隱居有父風後純貴贈介爲監察御  
史有臨清集行於世與孫蕡王佐李德黃哲

結社南園並稱五先生云

黃哲字庸之弱冠而孤刻苦讀書通五經詩入  
晉唐奧域雅好山水遨遊吳楚燕齊間交遊  
遍海內聲名藉甚太祖駐師金陵時招徠名  
儒丞相李善長參政張昶汪廣洋交薦之拜  
翰林待制入禁閣侍太子讀書兼翰林典籤  
左丞相徐達北征奏捷應試詩賦稱旨奉使  
青徐尋知山東東阿縣勤於爲政剖決如流  
且不事苛察民樂其寬值歲旱麥苗盡枯乃  
齋戒跣行烈日中禱於洪範池龍祠甘澍立



應民呼爲黃公雨狼溪有怪物能竊人啗之  
哲爲禱於天須臾風雨大作一青蛟斃水上  
邑人訝其誠感時邑經毛貴亂後戶口凋殘  
聞哲善政流徙者皆復其業陞東平通判會  
黃河決梁山中書省發民疏浚哲經畫有方  
民不告勞疏陳時務數上事皆人所難言者  
上怒其狂因乞歸有司請哲領郡教事橫經  
授徒旋復徵還判東平後以事註誤竟置於  
法子德輿輯其詩文號雪蓬集

王佐字彥舉家世河東元末占籍南海時孫蕡

與佐結詩社於南園開抗風軒以延一時名  
士佐才思雄渾體裁甚工蕡深重之構辭敏  
捷王不如孫用意沉着孫不如王會何真開  
署求士與蕡首被禮聘真敬二人皆使掌書  
記軍旅事多見諮詢時李質以德慶豪帥據  
有肇慶與蕡往說之質遂通好洪武六年用  
部使者薦拜給事中論思補闕恒稱帝意學  
士宋濂嘗拜賜黃馬帝爲歌命諸詞臣和之  
佐立就清新富贍如宿構者有臣騎黃馬當  
赤心之句帝覽而喜以爲名世之作賜鈔一

三城古金 卷六  
錠佐性不樂樞要居官二載卽乞骸骨帝憐其誠特俞所請陞辭日賜鈔五十千時天威嚴重臣僚自陳者多被譴斥佐以恭慎得歸時稱爲難天性孝弟父沒時有廖元正者爲料理喪事殯諸南雄之九里山終身事元正如父所爲詩清逸評者比之高適岑參云

縣志

邱濬字仲深瓊山人祖普業醫喜濟人不責其報宣德甲申大饑白骨遍野置義塚瘞之歲時灑以杯酒糲飯至老不倦濬生有異質書

過目成誦日記數千言六歲矢口爲詩歌多警語嘗詠五指山識者知爲國器稍長博觀羣籍年十七始習舉業揮筆數千百言立就正統甲子首舉於鄉卒業太學祭酒蕭滋深器之由是名著公卿間景泰甲戌學士商輅主試闕所爲文曰必邱濬也及揭名果然廷試擬弁多士或謂貌寢寘二甲第一入翰林爲庶吉士預修寰宇通志洗馬李紹見其博洽亟稱之濬自以遐陬新進一旦名籍都下益求人間秘書讀之尤熟當典故志成授

三才子金 卷六  
編修濬文章雄渾壯麗四方求者相踵然非其人雖厚幣不顧也天順七年兩廣用兵濬條列事宜大學士李賢見而上之命下所司舉行憲宗卽阼充經筵講官明年晉侍講預修英宗寔錄或謂少保于謙誅死當著其異謀濬曰已已之變微于公國事不知所終武臣挾怨誣之安可徇也衆乃止三年寔錄成擢侍講學士十三年續修宋元綱目成晉翰林學士尋擢國子祭酒十六年晉禮部侍郎仍掌監事撰大學衍義補百六十卷孝宗立

其書適成乃表上之擢禮部尙書掌詹事府錄其副書梓行之充憲宗寔錄副總裁四年寔錄成加太子太保是年冬兼文淵閣大學士入內閣乃奏請擇衍義補中要務行焉以寬大啟帝心忠厚變士習人才進退政事因革惟祖宗舊典是循五年上疏請釐革幣政時百司朝覲吏部考察以多黜爲公濬言唐虞三載考陟三載黜陟今有未半載而黜而徒循人言未必皆寔此非唐虞之法亦非祖宗之制帝深然之有太醫院官往來濬家以

三城百金 卷六  
三  
失職怨冢宰王恕奏訐其短或疑出濬意帝  
察其誣待之愈厚七年加少保兼太子太保  
改戶部尚書武英殿大學士力辭不許八年  
卒於官訃聞輟朝一日賻寶鈔萬貫贈特進  
太傅諡文莊濬性剛直與大臣論政必反覆  
辯難言官論事亦以是非詰之累歲求歸前  
後十三疏竟不許初經生以奇怪相高講學  
者或過爲詭行以微名濬典試及爲祭酒皆  
痛抑之嘗論朱子家禮最得崇本敦寔之意  
作朱子學的二十篇其他述著甚富入仕四  
十餘年產業僅能卒歲第宅不逾齊民所得  
奉賜卽充官費絕無贏餘正德初以孫瑩廕  
尚寶司丞卒復以曾孫郊襲賜祠額曰景賢  
子敦知名

梁有譽字公寔嘉靖庚戌進士先是李攀龍與  
濮州李先芳臨清謝榛孝豐吳維岳輩倡詩  
社王世貞初釋褐先芳引入社遂與攀龍定  
交先芳出爲外吏宗臣與有譽入是爲五子  
未幾徐中行吳國倫亦至改稱七子諸人多  
少年才高氣銳互相標榜視當世無人七才

子之名播天下擯先芳維岳不與已而榛亦  
被擯攀龍遂爲之魁其持論謂文自西京詩  
自天寶而下俱無足觀於本朝獨推李夢陽  
諸子翕然和之非是則詆爲宋學居三年嚴  
嵩柄國子世蕃欲親有譽有譽恥爲褻狎以  
養母告歸築拙清樓杜門讀書大吏至辭不  
見一日裹糧遊羅浮未至遇颶風得疾歸卒  
年三十六著有蘭汀集弟有貞棉州守亦以

詩名

順德縣志

陳獻章字公甫號石齋學者稱白沙先生父琮

號樂芸能詩隱居不仕獻章身長八尺目光  
如星左臉有七黑子如北斗狀少警敏絕人  
讀書一覽成誦常讀孟子至有天民句嘆曰  
大丈夫當如是也弱冠領正統丁卯鄉薦兩  
上春官不第聞聘君吳與弼講伊洛之學於  
臨川因往從遊比歸閉戶讀書盡窮古今典  
籍旁及釋老稗官野史徹夜不寐久之悔自  
得之旨遂築春陽臺靜坐其中者數年又以  
爲苟欲靜則非靜矣於是隨動靜以施其功  
暇日或講射禮於野時學士錢溥謫知順德

三城古金 卷六  
雅重之勸之北上遂復遊太學祭酒邢讓試  
和此日不再得詩驚曰龜山不如也由是名  
震京師已而歷事吏部日抱案牘偕羣吏主  
廳事下不少怠諸司官皆勉令休對日分當  
然也成化己丑南歸遂有終焉之志四方來  
學者日益衆乃築小廬山書室以待學者館  
穀不給時或貸粟於鄉人僉事陶魯聞之遺  
田若干頃不受御史熊達做洛陽故事欲建  
道德坊於白沙力爲止之因改樓江許顏曰  
嘉會時江西左轄陳煒修復白鹿洞書院迎

請主講席固謝不往成化十八年左右布政彭  
韶薦諸朝請以聘吳與弼故事起之有旨命  
有司以禮勸駕巡撫朱英亦疏薦之懼其不  
起疏未有臣已趨獻章就道之言因告之曰  
先生萬一遲遲其行則予爲誑君不得已往  
蒼梧與英別英預約束叅隨俟其掖從甬道  
出入獻章辭英嘆曰古王尊賢之禮有膝行  
式車者況區區乎至京師上疏以母老身病  
願放歸田里就醫終養辭母年九十有一而  
終獻章亦六十八矣哭擗如禮素與羅倫袁

道張黼交好及倫等卒皆爲位而哭先後服  
總三月奉先師孔子於碧玉樓有行必先告  
慕先哲崔清獻公與之亦懸像事之如師創  
議建慈元廟大忠祠於匡山以示風勵居恒  
訓學者曰去耳目支離之用全虛圖不測之  
神又曰知廣大高明不離乎日用優遊厭飫  
久之而後可入也又曰日用間隨處體認天  
理又曰舞雩三三兩兩正在勿忘勿助之間  
便是鳶飛魚躍又曰學以自然爲宗以忘已  
爲大以無欲爲至蓋其學初本乎周子主靜

程子靜坐之說以立其基而自得之效則有  
合乎見大心泰之詣故凡富貴功利得喪死  
生舉不足以動其心者蓋駸駸乎無意必固  
我之氣象矣其爲文主理而輔之以氣不拘  
於古人繩尺而自有大過人者性喜吟咏故  
其進退語默之機無爲自然之旨悉發乎詩  
書法本顏魯公時而縱筆恣態橫溢人得其  
片紙寶之若金玉一時縉紳先生皆尊事之  
相與辨論往還及門之士如遼東賀欽嘉魚  
李承箕番禺張詡增城湛若水順德李孔修

梁儲東莞林光其較著者也宏治十三年春  
寢疾屬纊前二日早具朝服命子弟扶掖望  
北瞻拜作詩以謝世遂畢年七十有二先是  
給事中吳世忠等疏以獻章及尙書王恕侍  
郎劉健學士張元楨祭酒謝鐸等同薦入內  
閣得旨起用命將入門而獻章卒朝野莫不  
惋惜萬歷間詔從祀孔庭諡文恭

湛若水字元明增城人生而穎悟宏治壬子以  
書魁其鄉從陳獻章遊嘗屏居一室潛心理  
學超然遠到比獻章卒心喪三年甲子以母

命復出過南昌謁莊景論學亟見獎許赴留  
都讀書辟雍祭酒章懋課以晬面盎背論奇  
之乙丑試禮闈衡文者讀其卷知其新會高  
弟也置第二登進士選庶吉士授編修時王  
守仁在吏部相與講明正學而修撰呂柟輩  
皆往來辨論一時學者稱爲甘泉先生奉使  
冊封安南却餽金便道奉母留都大開講席  
有甘泉問辨等書正德丁亥丁母憂歸廬墓  
三年產異瓜九寔相連人謂孝感所至服闋  
謝病復都講於西樵嘉靖初召補原官尋遷



南祭酒晉禮部侍郎上天德王道及聖學等  
疏嘗著獻納篇格物通以補大學衍義所未  
備錄本進呈並嘉納之累遷南京禮吏兵三  
部尙書兩滿二品考以老致政其設教以隨  
處體認天理爲宗旨曰此吾六字符也勿忘  
勿助其庶幾乎從遊甚衆呂柟蔣信其最著  
者所著心性書遵道錄等皆以羽翼聖經居  
天關置講田以贍四方來學嘉靖庚申卒年  
九十有五隆慶初贈太子少保諡文簡

歐大任字楨伯與梁有譽黎民表梁紹震相友

善嘉靖癸亥以明經試大廷瞿景淳得其卷  
驚曰一代才也特薦列第一由是海內無不  
知者授江都訓導轉光州學陞國子助教與  
七子並驅才或過焉上幸太學聞大任才名  
御書不二二字賜之晉大理評事多所平反  
陞南京工部員外晉郎中留都名公巨卿咸  
與交歡以老乞休卒年八十世稱南園後五  
子之一著有百越先賢志廣陵十先生傳思  
元堂旅燕浮淮游梁輶中雝館西署詔歸秣  
陵虞部諸集崇祀鄉賢康熙戊辰奉

旨徵取遺集其僕李英亦能詩文王世貞輩每過  
大任必問曰君家青衣安否一日偶報邊警  
館閣巨公集賦紀事詩英亦呈一絕云蕭關  
風急馬頻嘶四塞山河動鼓輦獨立高臺望  
烽火胡笳多在薊門西客大嘉異詩頁徐中  
行序之

順德縣志

海瑞字汝賢號剛峯瓊山左所人四歲而孤母  
謝氏矢志訓之自爲諸生時卽抱當世之務  
嘉靖己酉薦於鄉計偕伏闕上平黎策癸丑  
授南平教諭揭申棖剛者之辨鄉愿忠信廉

潔之似古人不見諸侯之守以廣勵學士其  
叅謁上官執憲綱抗師儒禮督學朱衡重之  
檄掌書院遷知淳安深念民瘼節省備至嚴  
嵩黨鄢懋卿以都御史經理八省齟政諸縣  
盛供帳至淳安瑞曰邑小民貧不足以奉車  
從待之簡約且按其生事者懋卿深銜之會  
瑞轉判嘉興懋卿嗾御史袁淳摘以他事改  
調興國擢戶部主事世宗久不御朝瑞抗疏  
直陳凡數千言帝覽之大怒擲其章於地留  
中不下踰數月逮下詔獄及世宗崩有提牢

主事攜酒饌入獄以款瑞瑞飲啖異平時主事曰先生今日何懼甚也瑞曰諒當伏法欲作飽鬼耳主事曰非也先生不日出此門矣告其故瑞聞之悉吐酒食於地放聲哭達旦閔日詔出之復其官改兵部晉尙寶丞改大理擢僉都御史巡撫應天豪氏墨吏望風歛戢吳淞江久淤爲陸而常熟白茆港河道日堙瑞疏濬之身乘小舟督畚鍤不替月告成賑活饑民數十萬清丈三吳田土豪右受獻者悉令還民於是權要構飛語遂解官歸里

居十五年前後薦者無慮十餘疏至謂忠貫日月望重中外萬歷乙酉起爲南僉都御史尋晉南吏部侍郎擢右都御史掌南院議革諸司冗役冗費極言軍民利病時御史房寰督學南畿物議沸騰瑞欲糾之寰先疏詆瑞觀政進士諸壽賢等抗言白瑞俱寢不下瑞亦屢乞歸不許丁亥八月卒於任僉都王用汲入視葛幃敝衣歎息泣下啟其篋僅十餘金訃聞贈太子少保諡忠介諭祭葬瑞雖官歷六卿編茅自處環堵蕭然子姓稍有不戢

必鳴之官未嘗假借尚書姜寶謂瑞天下奇  
男子志節兼狂狷云所著有備忘集淳安政  
事稿

梁儲字叔厚順德人生有異質丰儀秀偉音如  
洪鐘識者知其公輔器弱冠舉於鄉成化戊  
戌禮闈第一人廷試二甲第一人選庶吉士  
改編修兼司經局校書侍孝宗武宗東宮講  
讀冊封安南充正使悉却饋遺不與倍臣唱  
和時稱其得體進翰林學士教習庶吉士纂  
修寔錄會典擢少詹事兼學士擢吏部侍郎

正德初進尚書兼學士劉瑾惡其不附已指  
摘會典紕繆降右侍郎寔錄成復尚書兼職  
如故瑾憾不已徙南京吏部復矯詔將籍儲  
家在南都聞報色不少動蓋儲素廉自知家  
無長物也瑾敗召還以前職兼文淵閣大學  
士入叅機務尋兼武英殿大學士時都御史  
彭澤討西寇有功後處哈密乖方本兵欲置  
重典儲力救之止免官壬申四月流賊平加  
謹身殿大學士時少師楊廷和服闋儲力薦  
起既至遜居己上甲戌以一品兩考滿加少

師兼太子太師華蓋殿大學士戊寅奉安孝  
正皇太后於茂陵損益禮儀悉當亡何秦王  
請塞上沃地廣其封壤中官張銳嬖臣朱寧  
江彬受請帝許之羣臣交章執奏不聽廷和  
當草制念與地恐貽患不與帝怒不測則與  
大學士蔣冕皆引疾於是帝大怒促草制急  
儲草上曰高皇帝念此地不以封非有愛也  
地廣饒產善馬士卒鵬悍民生戎心奸萌從  
與不利社稷王受地毋俾德毋聚奸人毋多  
蓄士馬謀不軌震我邊方帝覽之大駭曰若

是其勿與已卯帝幸宣府欲自稱威武大將  
軍而以彬副召儲草敕手劍睨曰不草齒此  
於是儲免冠伏地涕泣請死曰安有臣名君  
者臣死不敢奉詔帝察其誠擲劍起彬復受  
宸濠賂請召其世子司香太廟大臣集閣會  
議儲正色曰上春秋鼎盛何遽及此萬一有  
他吾輩伏鑽矣邪謀安可聽耶衆悚然議遂  
寢儲善諫持正皆此類也是年以一品滿九  
載加特進光祿大夫左柱國庚辰宸濠反帝  
親征儲力請遣將不聽詔廷和居守儲冕扈

三才古錄 卷六  
從未至宸濠已平儲七請回鑾不聽留駐南  
都欲因舊壇大祀天地儲力言南北配位不  
同典章不可紊乃不果郊帝駐蹕久留都苦  
供億又聞欲幸吳楚民益洶洶儲以屢不得  
請乃與冕等自執章奏跪泣行宮外自未至  
西得旨乃起於是駕旋裏河丁夫數十萬久  
俟水次饑疫死者相藉儲令有司散遣之在  
途三疏求退不允抵京亡何與楊廷和等受  
遺詔迎世宗入繼大統寵眷方隆忌者陰嗾  
其黨論之儲亦累懇乞骸帝重違其志許之

手詔褒綸曰張九齡之忠蓋崔與之之風槩  
卿可謂兼之矣遣官護行乘傳還鄉命有司  
給月米輿隸以定策功廕子世襲錦衣衛指  
揮力辭乃進其子鈞甫秩儲雅有文譽六典  
文衡一時名士多出其門雅量休休不矜功  
伐論議常依忠厚溫言遜若無所忤至臨大  
節屹不可奪人或誣之未嘗疏辨有劾其黨  
宸濠假護衛者第曰吾去已矣勿問久之乃  
知當制者楊廷和也給事中田賦御史張璉  
王溱李鐸皆嘗劾儲或出風聞或聽人頤指

儲皆不較且薦璉用之而擢鐸爲大理丞其  
厚德比王且至於持正寤主且不及也晚年  
家居尤謙遜訪其師至里門必舍輿而前士  
林多之卒年七十七訃聞輟朝諭祭贈太師  
諡文康儲歷官四十餘年歸橐蕭然至不能  
治第門生相與經營始就有鬱洲稿行於世  
敘廕八人子次揆次挹並中書舍人次揭太  
學生贈州判官鈞甫尙寶司丞次挹以學行  
稱嘗讓爵於其弟後以銓曹疏薦復官之孫  
宸中書舍人敕太常少卿孜禮部主事欽禮  
部員外郎孜有逸才詩近中唐畫追元宋楷  
書得文徵明結法性謙和喜賓客曾孫紹曾  
舉於鄉

方獻夫字叔賢祖用中博學篤行父遂以鄉薦  
署全州學正遺腹生獻夫七歲卽苦學不輟  
宏治甲子舉第二明年成進士選庶吉士乞  
養歸起歷吏部文選員外郎正德中謝病歸  
與湛若水霍韜往來講學嘉靖癸未授考功  
員外郎會大禮議興廷臣依倣濮議獻夫上  
疏言今日有不可以濮議例者三少師楊廷

和見而惡之尋轉侍講學士大禮書成擢少詹事轉禮部右侍郎常以張寅獄久不白命桂萼攝刑部張璫攝都察院獻夫攝大理寺廷鞫之帝欲誅御史馬錄及其黨四十人獻夫與璫韜並疏救之錄得謫戍餘皆未減帝又欲誅建昌侯張延齡密詢之對曰昔漢文誅薄昭致母不食今殺延齡必傷昭聖太后心非盛德事遂寢後夏言伺帝意陰令董至等上變延齡始不免是冬遷吏部侍郎尋擢禮部尚書明倫大典成加太子太保改吏部

尚書陳修省諸疏多見採納卽謝病歸無何馳詔徵還晉少保兼武英殿大學士賜金章曰忠誠直諒嗣進光祿大夫柱國以病屢乞還山歸治第於西樵山麓卒贈特進太保諡文襄著有易經約說學解大學中庸二原西樵存稿子縻廕歷尚寶卿葉多智畧精騎射有平寇功累擢武定知府

霍韜字渭厓生而重瞳甫就小學卽揭居處恭三字於座前識者器之舉正德癸酉第二聯捷第一廷試二甲第一歸婚值權璫恣遂隱



三才古金 卷六 四  
西樵世宗登極授兵部主事大禮議起韜與  
方獻夫力排楊廷和之說著大禮議嘉靖元  
年上三劄一論聖學治道一論六部正務一  
論中外積弊時以董賈比之復謝病歸著書  
講學無虛日擢少詹事兩疏懇辭帝眷注彌  
切賜敬一箴洪範序及文獻通考部檄停諸  
司俸趣行乃復出薦王瓊魏校王守仁等三  
十餘人轉詹事上法祖十二條時江西提學  
徐一鳴毀寺散僧爲鎮守內官誣逮詔獄韜  
力救獲免進禮部侍郎尋擢尙書俱累辭不

拜己丑春星變風霾韜疏陳召災變者六帝  
嘉納之主會試唐順之羅洪先輩皆所取士  
克會典副總裁庚寅郊祀議興給事夏言首  
倡分祀韜持論過激帝震怒下獄繼復其官  
以憂去召爲吏部侍郎廣詢博訪多所鑿拔  
乙未議莊肅皇后謚應循舊典用十二字帝  
不悅竟以六字諡之適尙書汪鋐罷代秉銓  
衡選法一新無敢干以私者出爲南京禮部  
尙書己亥册立東宮徵拜太子太保禮部尙  
書掌詹事府事時九廟七陵工費靡極乃與

諭德鄒守益上聖功圖以諷帝怒詰責尋察其忠懇原之復有南巡之議韜因疏諫事遂寢既而權貴結術士以方技嗇神之說進韜疏力諫前後共九十上直聲震天下後卒於官贈太子太保諡文敏賜祭葬韜爲人質直好古行誼高潔平生肆力於居處恭卽獻納亦以此爲一義尤好進賢汲汲如不及所著有詩經註解象山學辨程朱訓釋霍氏家訓涓厓集西漢書纂評學者稱涓厓先生子與瑕與瓔與瑞並舉於鄉而與瑕登進士別有

